

Dialuna...

Autoridad a tene Briefing-General riba caso di Natalee

ORANJESTAD (AAN): Keto bay ainda autoridad no a soluciona e caso di e estudiante di 18 aña di Alabama kende ta perdi na Aruba, esta Natalee Holloway.

Ya ta tres siman desde cu el a perde, y comunidad Arubano ta biba den un tension y a cera conoci porfin con noticianan ta worde difundi den exterior, y con un isla inocente ta bira vulnerable den menos di un luna door di esaki.

Mayoria di prensa stranhero ta sigui enfoca riba esnan deteni. Pero ora cu cualkier grupo of fuente cumenza na cuestiona otro teoria... mesora nan ta worde hala un banda.

Recien mes DIARIO a publica un informe di ex-inspector Elio Nicolaas, y su teoria y sugerencia pa check tambe e background di famia Holloway y di famia Twitty. Pero ora cu Nicolaas a haya chance di aparece riba TV Mericano, su declaracion a worde pusha un banda. Awor Nicolaas a hasta haya e mensahe, cu nan lo no bay use mas pa 'entrevista' cu e canal ey.

Teorianan tin na cantidad. DIARIO a tende tur caba! Algun ta mas 'extremo' cu e otro. Tin ta papia di auto-secuestro, otronan di un secuestro. Natalee mes a busca forma pa huy di su mayornan? Tambe tin teoria cu e mayornan por ta involvi. Un lector a comenta cu e no a mira e mama derama ningun lagrima te ainda.

Cada vez ta worde treci dilanti, pakico no ta apunta dede den direccion di esnan na Alabama, responsable cu a viaha hunto cu e grupo di estudiante. A pone confianza den nan man pa un happy return pa Merca. Desde e momento e representante a tuma nota cu bao di esnan pa cual e ta responsable a nota cu e hobennan ta bebe di mas, e mester a tuma medida. No ta importa si e mucha muher por a conoce e mucha hombernan. Bo ta djis subi den bus of taxi hunto cune pa mi hiba hotel back.

Si bo no ta gusta ta pone bo riba prome vuelo rumbo pa Merca.

Den pasado a socede cu tin

grupo di Aruba a viaha pa Puerto Rico tabata tin un of mas hoben cu no a comporta nan mes corecto, esnan responsable a dicidi di manda back Aruba. Dios so sa si esnan cu ta tin e tarea pa tira vista riba e mucha nan mes tabata way out, of nan sa mes kico tabata pasando. Pero di e banda ey bo no ta scucha tende net net nada! Ta solamente di esnan di Aruba ta worde comenta.

AUTORIDAD A TENE BRIEFING

E problema di Natalee no a keda soluciona, pero Dialuna mainta e team investigador combina cu ayudo di Merca, Hulanda a tene un briefing entre nan mes relaciona cu e caso.

A papia, delibera, revisa, compila pa sa kico ta e siguiente paso cu ta bay tuma. Esey debi cu e puzzle pa soluciona no ta facil. Tin poco pieza ainda den e puzzle of no?

DIARIO sinembargo no a logra haya informacion si acaso agentenan di FBI tambe a forma parti di e briefing aki. Aunke por nota cu hopi presion ta bin di Mericanonan mes, kendenan ta exigi pa FBI haya mas envolvimento den e caso. E cantidad di e-mail cu DIARIO ta ricibiendo, ta indicativo di esey, incluyendo e hecho cu e Mericanonan aki ta bisando cu nan no kier bin Aruba mas.

Awor cu tin varios persona deteni fuera di e tres hobennan tin tambe un persona mas a bin acerca. Un homber cu ta traha abordo di Tattoo como DJ y kende a nace na Curaçao, pero su mayornan ta Arubano. E tin un of dos aña ta biba na Aruba. Ki rol e lo por tabata tin den e caso no ta conoci, y segun fuentenan e conoce un di e hobennan Surinameño.

Dialuna mainta el a presenta dilanti Huez Comisario, den compania di su abogado. Su ex-casa tambe tabata presente pafor pa asina dune sosten moral. Pero e hoben DJ a tapa su cara pa cameran local y internacional. Finalmente Huez Comisario a prolonga su detencion tambe.

Mientras tanto tata di hoben Hulandes, esta Paul van der

Sloot, durante di fin di siman na dos ocasion a haye obliga di presenta na Warda di Polis na Playa pa el a worde interroga. E prome biaha el a staciona su auto den Kruisweg, pero tog prensa a logra saca su potret. E siguiente biaha el a staciona su auto parti patras, pero tog prensa a bolbe intercepta su pasonan.

Paul van der Sloot a worde scucha como testigo, segun Polis a revela. Autoridad lo ta trata di saca afor kico e tata por sa mas, di locual a socede cu Natalee, como cu su yiu homber tabata esun cu tabata den contacto cu e mucha muher pa ultimo biaha.

Corte mientras tanto a prolonga detencion di e tres hobennan cu un siman mas. Dialuna merdia a circula ru-

mor di un otro detencion den e caso, pero esey no ta cuadra cu realidad.

BUSKEDA TA SIGUI AINDA

Keto bay DIARIO ta nota, cu tin hende ta buscando pa Natalee. Ainda por mira hende ta haci esey den area di Fisherman's Hut. Tambe por mira nan ta busca den area di Faro di California.

Por a nota cu turistanan mes ta esnan cu ta buscando na algun lugar. Nan a declara na DIARIO cu nan stima e isla, y ta cooperando pa purba di localiza e mucha muher aki.

Locual ta asunto tecnico, te cu awor a usa cacho special for di Florida, como tambe Helicopter di Guardacosta di Aruba y Antiyas cu equipo di imagen thermal. Pero no a logra descubri nada.

Mientras tanto, un grupo di

voluntario special den Buskeda, ta prepara pa viaha di Texas pa Aruba pa yuda e famia di Natalee. Nan lo bin cu nan cachonan special y tambe cu equipo di sonar dedica pa busca cadaver.

Mientras tanto, mama di Natalee a sigui declara cu e no ta bandona Aruba tanten cu no haya su yiu muher. Pero e otro miembronan di famia cu a bin e isla, lamentablemente no por keda. Asina mes riba Dialuna, e wela di crianza di Natalee a bandona Aruba pa regresa Merca.

Dialuna mes, por a mira e mama hunto cu amigonan, a cumenza ta reparti mas foyeto pa pone riba bentana di negoshinan. E foyeto awor hasta ta aparece na Spaño.

Pa huez comisario e detencion tabata legal y legitimo

Fiscal ta prolonga detencion di Dj di Tattoo



ORANJESTAD (AAN): Kico e sospechoso S. Croes tin di haci cu e caso di e hoben Mericano perdi ta keda un pregunta te ainda.

Diabierna e hoben aki a keda deteni den oranan di mainta unda e ta biba caminda el a keda sera y ayera dialuna e mester a bay dilanti di fiscal na Ministerio Publico pasobra eynan fiscal mester a dicidi si ta prolonga su detencion.

Despues di a sali for di Ministerio publico cu ocho dia mas di detencion preventivo el a bay na corte unda eynan el a topa cu huez comisario.



Huez comisario no ta esun pa dicidi riba e ocho dianan di detencion preventivo, pero fiscal di Ministerio Publico.

Den e caso aki e prolongacion aki tabata pa autoridad por sigui cu nan trabao di investigacion. E trabao di huez comisario den e caso aki ta pa mira si e detencion ta legal y legitimo.

Esey tabata e caso tambe pa cual motibo S. Croes a keda sera.

Nos a combersa cu vocero di Ministerio Publico kende ta confirma tambe e prolongacion di ocho dia.

Na corte tabata tey e frei di S. Croes cu no por a soporta

su lagrimanan y hasta a grita palabranan di sosten na su amor S. Croes.

Pa loko ta e otro sospechosonan den e caso mester bisa cu tur cos ta muestra cu kizas diabierna nan tey back na corte caminda cu nan lo mester bolbe dilanti di huez comisario.

Aki nan por haya un biaha mas ocho dia y si nan keda e ocho dianan aki y bolbe huez comisario e momento ey por prolonga e caso cu sesenta dia te ora cu nan mester presenta dilanti di huez.

Un caso cu keto bay ta halando atencion di prensa tanto local como internacional.